



NOTÆ BREVES.

Equidem animus haud erat, in publicam lucem dare festinata illa, quæ non ita pridem, poscente circuli Oratorii ordine, de amplissimâ hac materiâ feceram verba; sed cum deinde ob complures non levis momenti rationes ad illud inclinari me ab aliquibus passus essem, hærebam anxius, quonam modo commodissimè id exequi liceret. Nam singula quidem ex merito prolixè diducere, neque fortasse virium mearum erat, neque otii, cum ita in immodicam molem excrevisset illa Tractatio; ea verò quæ recitaveram tantum divulgare, nimis jejunum videbatur, quandoquidem vix Summa præcipuorum inventorum capita, non nisi obiter quasi, & per meas ferè præteritiones, ut canis è Nilo, delibare, ob angustum dicendi spatium tunc temporis poteram: idcirco medium quodammodo amplecti coactus sum, paucisq; in ipsa Oratione immutatis, breves quasdam Notas subnectere, in iisq; fontes saltem aperire constitui, è quibus haurire hæc mihi licuerit, ut si quis Lectorum plura de aliquibus scire gestiret, ex illis conceptam visceribus sitim restringere posset. Tu B. L. qui priora perlegere dignatus es, has quoque percurrere ne pigrescis!

(1.) At verò verba illa Psalmi 102. v. 27. non de lento quodam orbis langvore effœtoque senio, sed de totali illa mundi corruptione, quæ in ultima ejus conflagratione contingere debet, intelligenda esse manifestè notum est. Sed nos piguit, Senium istud mundi, quippe quod & rationi & revelationi & experientiæ denique repugnat, pluribus hinc refutare, cum id jamdudum præstiterint Viri Clarissimi, Gabriel Naudæus Epl. 42. Job. Freinshemius, Orat. 7. & 9. & Job. Jonstonus, in peculiari Diatribe, de Naturæ Constantia, quæ anno currentis seculi 32. Amstelodami prodiit, in qua per posteriorum temporum cum prioribus collationem Mundum nec ratione sui totius, nec ratione partium universaliter & perpetuò in pejus ruere, prolixè ostendit. Addatur etiam Christophori Schraderi Disp. de Naturæ senio, Lipsiæ Anno 1670. habita.

(2.) Horat. L. 3. Od. 6.

(3.) V. Verulam. de Augm. Scient. p. m. 20.

(4.) Ele-